



Sumáriu Kazu
Tribunál Judisiál Primeira Instáncia Díli
Janeiru 2023

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida. JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeria Instáncia Díli

1. Totál kazu ne'ebé JSMP monitoriza :17

Artigu	Tipu Kazu	Númeru
Artigu145 Kódigo Penál (KP), konjuga ho artigu 2, 3(a), 35(b) no 36 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika (VD) sira no artigu 36 kona-ba krime sira violénsia doméstika nian hanesan krime públiku)	17
Artigu 154 KP	Maus-tratus ba kónjuje	1
Artigu 145 KP no artigu 20 (1), artigu 2 (2 alinea f) Lei Arma Brankas	Krime ofensa ba integridade física simples ho natureza violénsia doméstika no arma brankas	1
Artigu 267 KP	Krime burla agravadu	1
	Krime ameasa no arma brankas	1
Artigu 140 KP	Krime omisídiu negligente	1
Totál		22

2. Totál desizaun ne'ebé JSMP monitoriza: 24

Tipu pena	Artigu	Númeru
Pena multa	Artigu 67 KP	11
Suspensaun ba prizaun nia ezekusaun	Artigu 68	7
Absolve		4

Totál		22
--------------	--	-----------

3. Totál kazu sira ne'ebé adia tuir JSMP nia monitorizasaun:0

4. Totál kazu sira ne'ebé sei kontinua prosesu tuir JSMP nia monitorizasaun: 0

B. Deskrisaun sumáriu Julgamentu ba desizaun kazu sira

1. Krime ofensa ba integridade física simples ho natureza violénsia doméstika

Nú. Prosesu : 0172/20 DINFT
 Kompozisaun Tribunál : Singular
 Juis : Dr. Ivan Patrosino Suritay A. Gonsalves
 Prokuradór : Dr. Luis Hernani Rangel
 Defeza : Dr. Jose Guterres
 Desizaun : Pena prizaun tinan 2 suspende ba tinan 2

Iha 10 Janeiro 2023, Tribunál Judisiál Primeria Instánsia Díli prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu MCG hasoru nia eis feen, iha Munisípiu Díli.

Akuzasaun prokuradór

Prokuradór akuza katak iha 28 Dezembru 2020, iha oras tuku 21:00 kalan, lezada ho nia primo ho motor fila husi lezada nia serbisu fatin, bainhira to'o iha parte kuluhun nian, arguidu hetan lezada no para tiha lezada ho nia primu. Arguidu lori tudik halai ba lezada nia primu nune'e lezada nia primu tauk hodi halai ses tiha. Ho nune'e arguidu tebe dala rua iha lezada nia kotuk laran, tebe dala rua iha lezada nia sorin parte loos no buti lezada nia kakorok no riba lezada ba rai. Arguidu nia hahalok ne'e rezulta bubu no moras iha lezada nia kotuk laran, sorin parte loos no kakorok. Kazu ne'e akontese tanba arguidu la simu lezada separa ho arguidu.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu sira iha akuzasaun no deklarata katak iha altura ne'e nia lakon kontrola hodi baku lezada tanba lezada husik hela arguidu. Arguidu deklarata mós katak arrende ona nia hahalok no sei la komete tan krime seluk hasoru lezada ka ema seluk iha futuru.

Iha julgamentu ne'e tribunál labele rona lezada ninia deklarasaun, tanba lezada edital.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2, 3 (a), 35 (b) no 36 LKVD.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian, mezmu arguidu ho lezada sepera ona, maibé atu prevene arguidu repete tan ninia hahalok ne'e iha futuru, husu ba tribunál atu kondena arguidu ho pena multa, tuir arguidu nia kondisaun.

Alende ne'e defeza mós konkorda ho alegasaun ministériu públiku nian atu kondena arguidu ho pena multa.

Desizaun

Depoisde avalia faktu hotu tribunál prova katak arguidu tebe dala rua iha lezada nia kotuk laran, tebe dala rua iha lezada nia sorin parte loos no buti lezada nia kakorok no riba lezada ba rai.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ona nia hahalok no promete sei la komete tan krime hanesan iha futuru. Ho nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

2. Krime ofensa ba integridade fízika simples ho natureza violénsia doméstika

Nú. Prosesu	: 0022/22.LILIQ
Kompozisaun Tribunál	: Singulár
Juis	: Dr. Argentino Nunes
Prokuradór	: Dr. Luis Hernani Rangel da Cruz
Defeza	: Dr. Nelson Borges
Desizaun	: Pena multa US\$45.00

Iha 13 Janeiro 2023, Tribunál Judisiál Primeria Instánsia Díli prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JAdS hasoru nia feen, iha Munisípiu Likisá.

Akuzasaun Prokuradór

Prokuradór akuza katak iha 25 Abril 2022, arguidu ba koa-ai ho nia maluk sira no lezada telefone ba arguidu haruka atu hola labarik nia farda eskola, telefone primeiru arguidu simu telefone no lezada hatete atu hola labarik nia farda eskola maibé arguidu taka tiha telefone, lezada tenta telefone tan ba arguidu maibé arguidu la simu telefone tanba arguidu nia osan laiha. Ho nune'e iha tuku 17:00 lokraik, arguidu foin fila husi serbisu koa ai, derepente de'it arguidu komesa tolok lezada ho liafuan ne'ebé ladiak no lori kapasete tuda ba lezada nia kabun parte knosen sorin loos hafoin buti lezada nia kakorok. Konsekuénsia husi arguidu nia hahalok ne'e lezada senti moras tanba hetan tuda no buti iha kakorok.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36

LKVD.

Produsaun ba prova sira

Iha prosesu julgamentu arguidu konfesa faktu hotu iha akuzasaun no deklarata katak iha momentu ne'eba arguidu sai ba serbisu la lori osan, maibé lezada telefone tuir haruka hola labarik nia farda eskola, arguidu rona ida ne'e taka tiha telefone no lezada kontinua telefone tan maibé arguidu la simu telefone tanba osan laiha. Ho nune'e arguidu komete aktu ne'e hasoru lezada. Arguidu mós deklarata katak ho lezada forma uma kain iha tinan 1992, iha oan na'in walu (8) na'in rua (2) mak forma ona família no na'in neen (6) sei eskola hotu. Arguidu arrepende ona nia hahalok, antes ne'e arguidu nunca problema ho lezada ka ema seluk foin primeiravés mai hatan iha tribunál.

Alende ne'e lezada kontinua konfirma faktu hotu iha akuzasaun no deklarata katak ho tauk lezada halai sai husi uma ba toba iha família sira no iha dadeer mak lezada foin fila fali ba uma depoisde konsulta iha ospital simu aimoruk hodi halo tratamentu ba nia saúde maibé la aneksa atestadu médiku.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mós husi lezada, nune'e atu halo prevensaun atu krime hanesan labele akontese tan iha futuro, nune'e husu ba tribunál atu aplika pena ne'ebé hakerek ona iha artigu 145 KP.

Entretantu defeza husu ba tribunál atu konsidera arguidu nia situasaun katak arguidu konfesa, kolabora diak ho tribunál, moris hamutuk hanesan feen ho laen iha tinan 1992 iha oan na'in walu foin primeiravés mai hatan iha tribunál, tanba ne'e defeza husu ba tribunál atu fó pena ne'ebé adekuadu ba arguidu.

Desizaun

Depisde avalia faktus sira hotu, tribunál prova katak, arguidu komete duni agresaun física hasoru lezada. Bazeia ba faktu provadu sira ne'e hotu no tetu mos sirkunstánsia atenuante sira hanesan arguidu konfesa, kolabora diak ho tribunál no foin primeiravés mai hatan iha tribunál. Ho nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu kada leron 0,50 sentavus durante leron 90. Tribunál mós fiksa pena alternative durante leron 60 prizaun, bainhira arguidu la kumpri pena multa refere.

3. Krime ofensa ba integridade física simples ho natureza violénsia doméstika

Nú. Prosesu : 0004/22.DIATR
Kompozisaun Tribunál : Singulár
Juis : Dra. Ana Paula Fonseca
Prokuradór : Dr. Napolião S. da Silva
Defeza : Dr. Sergio Dias Quintas
Desizaun : Pena multa US\$45.00

Iha 16 Janeiro 2023, Tribunál Judisiál Primeria Instánsia Díli prezide julgamentu leitura

sentensa ba krime

ofensa ba integridade fízika simples ho natureza violénsia doméstika ne'ebé envolve arguidu SMdJ hasoru nia feen, iha Munisípiu Atauro.

Akuzasaun Prokuradór

Prokuradór akuza katak iha 08 Marsu 2022, iha oras tuku 12:00 meiodia, arguidu ho kondisaun lanu kaer lezada nia fuuk hodi rasta no tuku dala ida iha lezada nia kabun mamar, konsekuénsia husi agresaun fízika ne'e lezada hetan moras iha ulun no kabun mamar. Antes agresaun ne'e, arguidu ho lezada diskute malu kona-ba arguidu obriga lezada atu fó hotu osan ne'ebé mak entrega tiha ona ba lezada atu hadia motór, ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3, 35 no 36 LKVD.

Produsaun ba prova sira

Iha julgamentu arguidu konfesa faktu hotu iha akuzasaun, arrepende ona nia hahalok no promete sei la komete tan krime hanesan iha futuru.

Tribunál presindi lezada ninia deklarasaun tanba arguidu konfesa faktu hotu iha akuzasaun.

Alegasaun finál

Prokuradór konsidera arguidu provadu komete krime ofensa ba integridade fízika simples hasoru lezada, bazeia ba konfisaun arguidu nian, nune'e atu prevene krime ne'e akontese tan iha futuru husu ba tribunál atu kondena arguidu ho pena prizaun fulan tolu suspende ba tinan ida.

Entretantu defeza husu ba tribunál atu kondena arguidu ho pena ne'ebé adekuadu ho konsiderasaun katak arguidu konfesa, arrepende ona nia hahalok no promete sei la komete tan krime hanesan iha futuru.

Desizaun

Depoisde avalia faktu hotu tribunál prova katak arguidu ho kondisaun lanu kaer lezada nia fuuk hodi rasta no tuku dala ida iha lezada nia kabun mamar, konsekuénsia husi agresaun fízika ne'e lezada hetan moras iha ulun no kabun mamar.

Bazeia ba faktu provadu hirak ne'e no tetu mós ho sirkunstánsia atenuante sira hanesan, arguidu konfesa, arrepende ona nia hahalok, diak malu ona ho lezada no promete sei la repete tan krime hanesan iha futuru. Nune'e tribunál konklui prosesu ne'e no kondena arguidu ho pena multa US\$45.00 ne'ebé kada loron arguidu sei selu 50 centavus durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

4. Krime ofensa ba integridade fízika simples ho natureza violénsia doméstika no arma brankas

Nú. Prosesu : 0062/22 PNSIC
Kompozisaun Tribunál : Koletivu
Juis : Dr. Afonso Carmona, Dra. Francisca Cabral no Dra. Albertinha Neves
Prokuradór : Dr. Luis Hernani Rangel
Defeza : Dr. Sebastiao Amado
Desizaun : Pena prizaun tinan 3 suspende ba tinan 4

Iha 16 Janeiro 2023, Tribunál Judisiál Primeria Instánsia Díli prezide julgamentu leitura sentensa ba krime ofensa ba integridade fízika simples ho natureza violénsia doméstika konjuga ho krime arma brankas ne'ebé envolve arguidu LM hasoru nia feen, iha Munisípiu Díli.

Akuzasaun Prokuradór

Prokuradór akuza katak iha 29 Marsu 2022, iha oras tuku 7 kalan, arguidu tuku dala rua ho maka'as iha lezada nia ulun, tuku dala barak iha lezada nia isin lolon, tebe lezada monu ba rai no lori katana ameasa lezada nune'e " *hau taa mate ó ka lalika*". aktu ne'e rezulta kanek kiik iha lezada nia ulun, bubu no moras iha lezada nia isin, ain no halo lezada tauk. Antes agresauun ne'e arguidu ho lezada diskute malu kona-ba arguidu deskonfia lezada amante (*selingkuh*) ho mane seluk, ho nune'e mosu agresauun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2, 3 (a), 35 (b) no 36 LKVD, artigu 157 KP kona-ba ameasa ho moldura penál to'o tinan 1 ka multa no artigu 2 no artigu 20 Lei Arma Brankas.

Produsaun ba prova sira

Antes tama ba produsaun ba prova ba krime ameasa juis husu atu halo tentativa konsiliaun, iha prosesu tentativa konsiliaun ne'e, lezada prontu dada fali nia kazu hasoru arguidu no arguidu mós konkorda tanba ne'e hafoin rona pozisaun prokuradór no defeza ne'ebé konkorda ho dezisténsia husi lezada, nune'e husu ba tribunál atu omologa dezisténsia keixa ne'e, tribunál konklui pedidu ne'e no omologa pedidu dezisténsia keixa ne'e no absolve arguidu husi krime ameasa no kontinua julgamentu ba krime ofensa ba integridade fízika simples ho natureza VD no krime arma brankas.

Iha prosesu julgamentu arguidu konfesa parsialmente katak nia fila husi serbisu fatin haree lezada halimar facebook ho mane seluk, nune'e arguidu ba husu tuir lezada maibé tanba lezada lori telefone halai nune'e, arguidu tuku dala rua iha lezada nia kabaas parte loos, arguidu mós deklara katak lezada halai mak arguidu duni no lezada monu rasik, laos arguidu mak tebe monu lezada. Arguidu deklara mós katak arrepende ona nia hahalok no promete sei la repete tan hahalok hanesan iha futuro.

Entretantu lezada konfirma faktu hotu iha akuzasaun no deklara katak nia nunca halimar

facebook ho mane seluk no durante sira hola malu lezada iha deit telefone butaun kiik ida ne'ebé labele uza ba facebook, lezada mós deklara katak iha altura ne'e nia alin fetu mak ba iha sira nia uma no lori nia telefone kamera ida mak lezada empresta hodi haree foto maibé laos halimar facebook.

Alegasaun finál

Iha prosesu julgamentu, prokuradór konsidera arguidu provadu prátika krime ofensa ba integridade fízika simples hasoru lezada no krime arma brankas, mezmú arguidu koko atu nega faktu balun, maibé lezada konfirma, nune'e husu ba tribunál atu aplika pena prizaun efetivu tinan 3 ba arguidu.

Entretantu defeza husu ba tribunál atu tetu sirkunstánsia hotu-hotu ne'ebé iha no aplika pena ne'ebé labele limita arguidu nia liberdate nune'e arguidu bele haree nia oan sira ne'ebé sei prezisa arguidu nia kontribuisaun ba nia-oan sira nia nesesidade.

Desizaun

Depoisde avalia faktu hotu tribunál prova katak arguidu tuku dala rua ho maka'as iha lezada nia ulun, tuku dala barak iha lezada nia isin lolon, tebe lezada monu ba rai no lori katana ameasa lezada nune'e "*hau taa mate ó ka lalika*". aktu ne'e rezulta kanek kiik iha lezada nia ulun, bubu no moras iha lezada nia isin, ain no halo lezada tauk.

Bazeia ba faktu provadu hirak ne'e nune'e tetu mós ho sirkunstánsia atenuante sira ne'ebé haleu krime ne'e, nune'e tribunál konklui prosesu ne'e no kondena arguidu ba krime ofensa ba integridade fízika simples ho natureza violénsia doméstika ho pena prizaun tinan neen no ba krime arma brankas ho pena prizaun tinan tolu. Husi komulasaun pena rua ne'e tribunál aplika pena unika tinan tolu prizaun suspende ba tinan haat.

5. Krime ofensa ba integridade fízika simples ho natureza violénsia doméstika

Nú. Prosesu : 0224/20.DIDIL
Kompozisaun Tribunál : Singulár
Juis : Dr. Ivan Patrocínio A. Gonçalves
Prokuradór : Dr. Napolião S. da Silva
Defeza : Dr. Manuel Exposto
Desizaun : Pena multa US\$90.00

Iha 17 Janeiro 2023, Tribunál Judisiál Primeria Instánsia Díli prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MPDL hasoru nia feen, iha Munisípiu Díli.

Akuzasaun Prokuradór

Prokuradór akuza katak iha 21 Outubru tinan 2020, iha oras maizumenus tuku 08:30 dadeer, arguidu basa ho maka'as dala rua iha lezada nia kanuruk, tebe dala rua iha lezada nia kanotak parte loos rezulta lezada monu tun ba rai no kontinua basa dala rua iha lezada nia kanuruk. Antes agresaun ne'e, arguidu ho lezada diskute malu kona-ba lezada haruka arguidu atu kous sira nia oan ne'ebé sei bebe maibé arguidu lakohi, ho

nune'e mosu agresaun hirak ne'e. Konsekuénsia husi agresaun ne'e lezada hetan moras maka'as no bubu iha kanuruk, lezada mós ba halo tratamentu iha PRADET.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3, 35 no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arrepende ona nia hahalok no deklarara katak di'ak malu fali ona ho lezada no agora dadaun moris hamutuk fali ona hanesan feen ho la'en.

Tribunál presindi lezada nia deklarasaun tanba arguidu konfesa faktu hotu iha akuzasaun.

Alegasaun finál

Prokuradór konsidera arguidu nia aktu ne'e priense elementu husi krime ofensa ba integridade fízika simples, no kazu ho natureza violénsia doméstika kada loron sempre julga iha tribunál, nune'e atu prevene krime ne'e akontese tan iha futuro, husu ba tribunál atu kondena arguidu ho pena prizaun fulan hat suspende ba tinan ida.

Entretantu defeza husu ba tribunál atu kondena arguidu ho pena multa tuir nesesidade arguidu nian, ho konsiderasaun arguidu konfesa, arrepende ona nia hahalok no promete sei la komete tan krime hanesan iha futuro.

Desizaun

Depoizde avalia faktu hotu tribunál prova katak arguidu basa ho maka'as dala rua iha lezada nia kanuruk, tebe dala rua iha lezada nia kanotak parte loos rezulta lezada monu tun ba rai no kontinua basa dala rua iha lezada nia kanuruk.

Bazeia ba faktu provadu hirak ne'e no tetu mós ho sirkunstánsia atenuante sira hanesan, arguidu konfesa, arrepende nia hahalok, diak malu ona ho lezada no promete sei la repete tan krime hanesan iha futuro. Nune'e tribunál konklui prosesu ne'e no kondena arguidu ho pena multa US\$90.00 ne'ebé kada loron arguidu sei selu 0,75 sentavus durante loron 120. Tribunál mós fiksa pena alternativa durante loron 90 prizaun, bainhira arguidu la kumpri pena multa refere.

6. Krime ofensa ba integridade fízika simples ho natureza violénsia doméstika

Nú. Prosesu : 0061/21.DIDIL
Kompozisaun Tribunál : Koletivu
Juis : Dra. Albertina Neves, Dra.Edite P. dos Reis no Dr. Afonso Carmona
Prokuradór : Dr. Luis Hernani Rangel da Cruz
Defeza : Dr. Jose da Silva
Desizaun : Pena prizaun fulan 3 suspende ba tinan 1

Iha 17 Janeiro 2023, Tribunál Judisiál Primeria Instánsia Díli prezide julgamentu leitura

sentensa ba krime ofensa ba integridade fízika simples ho natureza violénsia doméstika ne'ebé envolve arguidu JRVS hasoru nia eis feen, iha Munisípiu Díli.

Akuzasaun Prokuradór

Prokuradór akuza katak iha 26 Abril 2021, iha oras tuku 22:00 dadeer, arguidu tuku dala ida iha lezada nia matan, hafoin uza mós xave ingles hodi baku dala ida iha lezada nia liman parte karuk, ain-tuur parte karuk no loos, hafoin arguidu mós uza metru hodi baku kona iha lezada nia inus parte karuk. Antes agresau ne'e, arguidu ho lezada diskute malu kona-ba arguidu kaer toman mane seluk tula lezada ho kareta.

Tuir mai iha 05 Jullu 2021, iha oras ne'ebé la apura arguidu tuku dala ida iha lezada nia kakorok, rezulta moras. Motivu husi problema ne'e, arguidu obriga lezada atu halo relasaun seksuál iha kareta laran, maibé lezada lakohi. Iha tinan 2020 data no fulan ne'ebé lezada haluha ona, iha lezada nia serbisu fatin, arguidu tuku dala ida iha lezada nia kanuruk, rezulta moras. Antes agresau ne'e, arguidu ho lezada diskute malu kona-ba arguidu deskonfia lezada amante (*selingkuh*) ho nia kolega iha serbisu fatin.

Iha 2017, iha data no fulan ne'ebé lezada haluha ona, maizumenus iha oras tuku 8:00 dadeer, arguidu basa dala ida iha lezada nia hasan parte loos kauza moras, arguidu mós tolok lezada. Antes agresau ne'e, arguidu ho lezada diskute malu kona-ba arguidu deskonfia lezada amante (*selingkuh*) ho mane seluk. Konsekuénsia husi arguidu nia hahalok ne'e lezada senti moras iha parte kakorok, matan, liman, ain-tuur, inus no hasan tanba hetan bebeik agresau fíziku no mal trata husi nia laen to'o ikus mai lezada ho arguidu husik malu tanba lezada la aguenta ho arguidu nia hahalok.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3(a), 35 no 36 LKVD.

Produsaun ba prova sira

Iha julgamentu, arguidu deklara katak faktu seluk loos hotu no faktu ne'ebé laloos mak arguidu laos tuku maibé basa deit lezada nia hasan, arguidu arrepende ona nia hahalok, promete sei la komete tan krime hanesan iha futuru no foin primeiravés mai hatan iha tribunál. Arguidu deklara liután katak ho lezada forma uma kain iha tinan 2017, iha oan nai'n 2, agora dadauk arguidu hela ketak lezada hela ho nia oan na'in rua (2) hamutuk ho nia inan-aman. Alende ne'e arguidu mós deklara katak hakarak fila fali ba nia feen ho nia oan sira, arguidu ho lezada sei iha komunikaun diak, lor-loron arguidu mak tula nia oan sira ba eskola, no arguidu responsavel nafatin hanesan aman ba nia oan sira.

Alende ne'e lezada kontinua konfirma faktu hotu iha akuzasaun no deklara katak konsekuénsia husi arguidu nia hahalok ne'e lezada sofre moras no ba halo tratamentu iha ospitál. Tanba ne'e lezada senti la aguenta ho arguidu nia hahalok ne'e, nune'e lezada decide ho oan sira hela ketak husi arguidu.

Alegasaun finál

Prokuradór konsidera arguidu ninia hahalok ne'e provadu priense duni elementu krime

ofensa ba integridade física simples hasoru lezada, nune'e atu prevene krime hanesan akontese tan iha futuru husu ba tribunál atu kondena arguidu ho pena prizaun tinan rua suspende ba tinan rua.

Entretantu defeza haktuir katak arguidu deklara faktu ne'ebé nia komete, arrepende ona nia hahalok, foin primeiravés mai hatan iha tribunál no promete sei la komete tan krime hanesan iha futuru, nune'e husu ba tribunál atu kondena arguidu ho pena ne'ebé adekuadu.

Desizaun

Depoisde avalia faktu hotu tribunál prova katak iha 26 Abril 2021, iha oras tuku 22:00 dadeer, arguidu tuku dala ida iha lezada nia matan, hafoin uza mós xave ingles hodi baku dala ida iha lezada nia liman parte karuk, ain-tuur parte karuk no loos, hafoin arguidu mós uza metru hodi baku kona iha lezada nia inus parte karuk, iha 05 Jullu 2021, iha oras ne'ebé la apura arguidu tuku dala ida iha lezada nia kakorok no arguidu basa dala ida iha lezada nia hasan parte loos kauza moras, arguidu mós tolok lezada.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu arrepende ona nia hahalok, foin primeiravés mai hatan iha tribunál no promete sei la komete tan krime hanesan iha futuru, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

7. Krime ofensa ba integridade física simples ho natureza violénsia doméstika

Nú. Prosesu	: 0063/22.PCCIC
Kompozisaun Tribunál	: Singulár
Juis	: Dra. Albertina Neves
Prokuradór	: Dr. Napolião Soares da Silva
Defeza	: Dra. Agostinha de Oliveira
Desizaun	: Pena multa US\$60.00

Iha 18 Janeiro 2023, Tribunál Judisiál Primeria Instánsia Díli prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AA hasoru nia feen, iha Munisípiu Díli.

Akuzasaun Prokuradór

Prokuradór akuza katak iha 07 Fevereiro 2022, iha oras maiszumenus tuku 23:30 kalan, arguidu buti ho maka'as iha lezada nia kakorok, tuku dala ida iha lezada niaibun laran, silu lezada nia liman lo'os dala ida. Antes agresaun ne'e, arguidu ho lezada diskute malu kona-ba lezada la fó osan ba arguidu nia alin atu sosa telemovel, ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3, 35 no 36 LKVD.

Produsaun ba prova sira

Iha prosesu julgamentu arguidu konfesa faktu hotu iha akuzasaun, foin primeiravés mai

hatan iha tribunál, arrepende ona nia hahalok no depoisde akontesimentu ne'e husu ona diskulpa ba lezada no agora dadaun nafatin moris hamutuk hanesan feen ho laen.

Alende ne'e lezada kontiua konfirma faktu hotu iha akuzasaun no deklara katak diak malu ona ho arguidu no agora dadaun moris hamutuk nafatin hanesan feen ho laen.

Alegasaun finál

Prokuradór konsidera faktu hotu provadu, bazeia ba konfisaun arguidu nian no konfirma mós husi lezada, nune'e atu prevene krime ne'e akontese tan iha futuru husu ba tribunál atu kondena arguidu ho pena prizaun fulan tolu suspende ba tinan ida.

Entretantu defeza husu ba tribunál atu fó pena admoestasaun ba arguidu ho razaun arguidu konfesa, foin primeravés mai hatan iha tribunál, arrepende ona nia hahalok no diak malu ona ho lezada. Alende ne'e arguidu mak iha responsabilidade ekonomia ba família.

Desizaun

Depisde avalia faktus sira hotu tribunál prova katak arguidu buti ho maka'as iha lezada nia kakorok, tuku dala ida iha lezada niaibun laran, silu lezada nia liman lo'os dala ida.

Bazeia ba faktu provadu sira ne'e hotu no tetu mós sirkunstánsia atenuante sira hanesan arguidu konfesa, arrepende ona nia hahalok, arguidu mak responsabiliza ba família uma laran, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu 0,50 sentavus durante loron 120 nia laran. Tribunál mós fiksa pena alternativa durante loron 90 prizaun bainhira arguidu la kumpri pena multa refere.

8. Krime ofensa ba integridade fízika simples ho natureza violénsia doméstika

Nú. Prosesu : 0064/21.ERSIC
Kompozisaun Tribunál : Singulár
Juis : Dr. Ivan Antonino Patrocinio Goncalves
Prokuradór : Dr. Simão Seixas
Defeza : Dr. Sergio Dias Quintas
Desizaun : Pena multa US\$60.00

Iha 18 Janeiro 2023, Tribunál Judisiál Primeria Instánsia Díli prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu BS hasoru nia feen, iha Munisípiu Ermera.

Akuzasaun Prokuradór

Prokuradór akuza katak iha 14 Agostu 2021, iha oras maiszumenus tuku 04:00 madrugada, arguidu tolok lezada, tuku dala haat iha lezada nia ulun parte karuk no loos no tuku tan dala tolu iha lezada nia kanotak, la to'o iha ne'e deit arguidu kontinua foti tan kadera baku dala ida iha lezada nia kabaas. Antes agresau ne'e, arguidu ho lezada diskute malu kona-ba labarik tanis lapara, ho nune'e mosu agresau hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3(a), 35 no 36 LKVD.

Produsaun ba prova sira

Iha prosesu julgamentu, arguidu deklara katak faktu balun laloos no faktu balun loos, faktu ne'ebé loos maka arguidu tuku dala ida deit iha lezada nia ulun no tuku dala ida iha lezada nia kanotak no lori kadera baku dala ida iha lezada nia kabaas. Kazu ne'e akontese bainhira rona sira nia oan tanis arguidu fanu lezada maibé lezada lakohi hader nune'e arguidu halo agresauun ne'e hasoru lezada. Arguidu mós deklara katak diak malu ona ho lezada no sei kontinua moris hamutuk hanesan feen ho laen.

Enkuantu lezada kontinua konfirma faktu hotu iha akuzasaun no konfirma mós ho arguidu nia deklarasaun katak sira diak malu ona no moris hamutuk nafatin iha uma ida.

Alegasaun finál

Prokuradór konsidera arguidu provadu komete krime hasoru lezada, mezmú arguidu koko atu nega faktu balun, maibé lezada konfirma, nune'e atu prevene krime ne'e akontese tan iha futuru husu ba tribunál atu kondena arguidu ho fó pena multa.

Entretantu defeza haktuir katak arguidu deklara deit faktu ne'ebé nia komete, depoisde akontesimentu ne'e diak malu ona ho lezada no moris hamutuk nafatin iha uma ida, nune'e husu ba tribunál atu fó pena ne'ebé adekuadu ba arguidu.

Desizaun

Depoisde avalia faktu hotu tribunál prova katak arguidu tolok lezada, tuku dala haat iha lezada nia ulun parte karuk no loos no tuku tan dala tolu iha lezada nia kanotak, la to'o iha ne'e deit arguidu kontinua foti tan kadera baku dala ida iha lezada nia kabaas.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu diak malu ona ho lezada no moris hamutuk nafatin iha uma ida, nune'e tribunál konklui prosesu ne'e no kondena arguidu ho pena multa US\$60.00, ne'ebé arguidu sei selu 0,75 sentavus kada loron, durante loron 80. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

9. Krime ofensa ba integridade fízika simples ho natureza violénsia doméstika

Nú. Prosesu : 0013/22.ERERM
Kompozisaun Tribunál : Singulár
Juis : Dra. Albertina Neves
Prokuradór : Dr. Simeão B. Seixas
Defeza : Dr Sergio Dias Quintas
Desizaun : Absolve

Iha 19 Janeiro 2023, Tribunál Judisiál Primeria Instánsia Díli prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AX hasoru nia oan, iha Munisípiu Ermera.

Akuzasaun Prokuradór

Prokuradór akuza katak iha 06 Maiu 2022, iha oras maizumenus tuku 19:00 kalan, arguidu lori alu baku dala ida iha lezada nia matan fukun rezulta kanek. Antes agresaun ne'e, arguidu ho lezada diskute malu kona-ba arguidu haruka lezadu atu taka ahi lezadu haluha taka, nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3(c), 35 no 36 LKVD.

Produsaun ba prova sira

Iha prosesu julgamentu, arguidu nega faktu hotu iha akuzasaun no deklarata katak lezadu iha moras mental arguidu lori lezadu ba ospital Gleno hodi halo tratamentu, nune'e lezadu hela ho nia tiu iha Gleno, lezadu kaer katana atu ba hamoos kafé duut, maibé fila mai tesi hotu mangeira bee no halo rahun Radio iha uma laran no kaer katana ne'e hodi la'o mai atu taa arguidu ho nune'e arguidu foti alu iha dapur nia odamatan hodi defende nia an mak kona nia matan fukun parte loos.

Alende ne'e lezadu mós deklarata katak iha akontesimentu ne'e lezadu la hatene aan ou la sadar tanba konsekuensi hosi nia moras mental ne'e, lezadu deklarata mós katak lezadu kaer duni katana la'o ba atu ta'a arguid, ho nune'e arguidu foti alu fai ba lezadu nia matan fukun rezulta kanek iha matan fukun.

Testemuña TM depoimenta katak momentu ne'eba nia mós hamrik hela no haree lezadu tesi mangeira bee nian, halo rahun radio no kaer katana la'o ba arguidu atu taa maka arguidu foti alu iha dapur nia odamatan hodi fai ba lezadu nia matan fukun rezulta kanek.

Alegasaun finál

Prokuradór konsidera faktu hotu provadu bazeia ba konfisaun arguidu nian no konfirma mós husi lezadu, nune'e husu ba tribunál atu kondena arguidu ho pena ne'ebé adekuadu.

Entretantu defeza husu ba tribunál atu absolve arguidu husi krime ne'e, tanba iha akontesemetu ne'e arguidu halo auto defeza ba nia an.

Desizaun

Depoisde avalia faktu hotu, tribunál konsidera katak arguidu ho intensaun atu salva nia aan husi lezadu ne'ebé kaer hela sasan kroat, nune'e tribunál konklui prosesu hodi absolve arguidu husi prosesu ne'e.

10. Krime burla agravadu

Nú. Prosesu	: 0152/19.PNSIC
Kompozisaun Tribunál	: Koletivu
Juis	: Dra. Ana Paula Fonseca, Dra Zulmira Barros, Dr. Ivan P. Gonçalves
Prokuradór	: Dr. Gustavo da Silva

Defeza : Dr. João Cortreal
Desizaun : Absolve

Iha 23 Janeiro 2023, Tribunál Judisiál Primeria Instáncia Díli prezide julgamentu leitura sentensa ba krime burla agravadu ne'ebé envolve arguida Juleita Gusmão Soares hasoru lezadu Pascoal Ximenes Pereira, iha Munisípiu Aileu.

Akuzasaun Prokuradór

Prokuradór akuza katak iha tinan 2012, Sr João Francisco ba empresta lezadu nia osan ho montante US\$15.000 no lezadu fazeadamente entrega osan ho montante refere ba Sr. João Francisco, husi empresta ne'e la consegue selu osan refere ba lezadu. Nune'e Sr. João Francisco uza maneira hanesan halo prokurasaun kona-ba ba arguidu nia uma ho rai, hodi fó ba lezadu hanesan maneira ida hodi selu fali lezadu nia osan, antes Sr. João halai tiha ba Indonézia to'o agora.

Maibé bainhira lezadu atu ba okupa Sr. João nia uma tuir prokurasaun ne'ebé iha, hetan impedimentu husi arguida Juleita ne'ebé apresenta mós karta prokurasaun husi Sr. João hodi okupa uma refere. Nune'e lezadu koalia ho arguida oinsa atu bele okupa uma refere. Bainhira lezadu koalia buka dalan atu rezolve, arguida apresenta katak nia bele entrega uma refere ba lezadu, maibé lezadu tenke selu hotu osan ne'ebé maka arguidu Joao deve ho montante US\$21.350.00 no lezadu mós aseita, ho nune'e lezadu komesa entrega osan ho montante refere fazeadamente ba arguida maka hanesan tuir mai.

Iha 10 Agostu 2015, lezadu entrega osan ba arguida ho montante US\$4.000, iha 20 Agostu 2015, lezadu entrega osan ba arguida ho montante US\$350.00, iha 25 Agostu 2015, lezadu entrega osan ba arguida ho montante US\$10.000.000, iha 10 Outubru 2015, lezadu entrega osan ba arguida ho montante US\$5.00, iha 4 Outubru 2015, lezadu entrega osan ba arguida ho montante US\$5.000, iha 2 Dezembru 2015, lezadu entrega osan ba arguida ho montante US\$1.000, iha 14 Maiu 2017 lezadu entrega osan ba arguida ho montante US\$1.000.

Prokuradór akuza arguida kontra artigu 267 KP kona-ba burla agravadu ho moldura penál too tinan 3 ka multa.

Produsaun ba prova sira

Iha prosesu julgamentu, arguida deklara katak simu duni osan refere husi lezadu maibé osan refere laos fó ba arguida ka arguida mak husu maibé lezadu entrega osan fazeadamente ba arguida ho objetivu atu selu tusan balu ne'ebé Sr. João Francisco debe ema seluk nia osan. Arguida mós deklara katak alende ne'e selu ema seluk nia osan, lezadu entrega osan ba arguida hodi fasilita tarata prokurasaun sira ba uma ka aset husi Sr. João nian. Arguida mós deklara ba tribunál katak lezadu haruka selu no tarata surat sira ne'e hodi ikus bele faan uma ka rai husi Sr. João nian no osan refere sira sei fahe malu inklui ho testemuña Sr.Tara.

Enkunatu lezada konfirma ho akuzasaun sira no deklara ba tribunál katak nia fó duni osan sira ne'e ba arguida atu bele selu tusan sira ne'ebé Sr, João deve antes nune'e bele

haruka arguida sai husi uma Sr. João nian ne'ebé arguida okupa hela ba tanba uma refere sai hanesan garantia ba osan ne'ebé Sr João deve husi lezadu.

Testemuña Agostu Tara Araújo depoimentu katak negosiasaun entre testemuña ho Sr. João hodi intrega prokurasauun ho objetivu atu faan rai ne'ebé lokaliza iha Aileu no laos faan uma. Testemuña deklara katak nia la hatene no haree kona-ba lezadu entrega osan ba arguida, testemuña hatene husi arguida, tanba arguida mak informa ba testemuña.

Testemuña Salvador Godinho do Regó depoimentu katak nia hatene katak lezadu mak lori osan mai entrega ba arguida, no laos arguida mak husu osan sira ne'e. Testemuña mós deklara katak bainhira lezadu mai entrega osan ba arguidu testemuña tuur iha oin no haree maibé la hatene kona-ba osan hira no atu halo saida tanba arguidu tuur ho distansia ne'ebé dook uituan.

Alegasaun finál

Prokuradór haktuir katak arguida konfesa parsialmente ba faktu sira iha akuzasaun kona-ba osan sira ne'ebé lezadu entrega ba arguida. Arguida mós deklara katak osan refere laos selu ba nia maibé ho intensaun atu selu deve sira hodi nune'e bele faan rai no lukru sira fahe hamutuk, maibé lezada konfirma katak osan sira ne'e nia fó ba arguida hodi selu duni Sr. Joao nia deve sira atu nune'e bele haruka arguida sai ona husi uma ne'ebé arguida hela ba tanba uma ne'e sai hanesan garantia ba iha tusan ne'ebé Sr. João deve husi lezadu. Konfirma ho testemuña sira katak lezadu fo duni osan ba arguida. Nune'e prokuradór mantein nafatin akuzasaun no husu ba tribunál atu kondena arguidu tuir konfiksaun tribunál no husu atu arguidu devolve fali lezadu nia osan ne'ebé arguidu uja ona.

Entretantu parte defeza husu ba tribunál atu apresia ba arguida nia deklarasaun no husu pena ne'ebé mak adekuaudu, tanba arguida konfesa ona ba tribunál katak laos nia mak ba husu osan sira ne'e husi lezadu, no lezadu duni mak mai entrega osan sira ne'e atu bele selu tusan sira antes husi Sr. Joao nian. Kona-ba indemnizasaun arguida sei rekopera fali.

Desizaun

Depoisde avalia faktu hotu, tribunál prova katak faktus sira la aprovaudu nune'e tribunál konklui prosesu ne'e hodi absolve arguida husi prosesu ne'e.

11. Krime ameasa no pose arma brankas

Nú. Prosesu	: 0058/20. PDDIL
Kompozisaun Tribunál	: Kolektivu
Juis	: Dr. Ivan Patrocínio Antonino Dra. Ana Paula Fonseca, Dr.
Prokuradór	: Dra. Bemvinda do Rosario ^[1] _{SEP}
Defeza	: Dr. Lito Expostu
Desizaun	: Pena prizaun tinan 3 suspende ba tinan 3 fulan 2

Iha 24 Janeiro 2023, Tribunál Judisiál Primeria Instánsia Díli halo julgamentu leitura akordaun ba krime ameasa no pose arma branka ne'ebé envolve arguidu Antonio

Gonçalves hasoru lezada Zulmira Soares ho nia oan Zenicia Soares Amaral no Zenivia Gonçalves, iha Manleuna-Munisípiu Díli.

Akuzasaun Prokuradór

Prokuradór akuza katak iha 26 Marsu 2021, iha oras maiszumenus tuku 16:00 lokraik, iha Manleuana, arguidu fila mai uma ho kondisaun lanu, arguidu kaer aperta lezada Zenicia Soares Amaral (oan) nia isin lolon no arguidu hodi tudik atu sona, ho ida ne'e lezada Julmira Soares baku ses tiha arguidu nia liman ne'ebé kaer tudik hodi lezada Zenicia halai ses tiha.

Tanba ne'e arguidu fila-fali ho tudik ba lezada Zevia atu sona tan no lezada Zulmira baku monu tiha tudik husi arguidu nia liman hodi lezada sira senti tauk no halai ses husi fatin akontesimentu. Mezmu nune'e arguidu kontinua foti tudik hodi duni tuir lezada sira too toman arguidu atu sosa tan lezada Zulmira nia kakorok, maibé lezada konsege ses an tiha husi fatin. konsekuénsia husi arguidu nia hahalok ne'e halo lezada sira senti tauk no trauma no motivu husi prolema ne'e rasik lezada la hatene.

Produsaun ba provas sira

Iha prosesu julgamentu arguidu konfesa integralmente ba faktu ne'ebé akuza ba arguidu arguidu mós deklarara katak iha momentu ne'eba nia ba ho kondisaun lanu tanba ne'e nia la hatene aan, arguidu mós arrepende ona nia hahalok no promete sei la komete tan krime hanesan iha futuru.

Alegasaun finál

Prokuradór husu ba tribunál atu kondena arguidu tanba uza arma providu ne'ebé lei bandu hodi ameasa ema no ida ne'e ba nia oan ho nia feen rasik, mezmu depoisode akontesementu ne'e too agora sira la hela hamutuk ona. Tanba ne'e husu tribunál atu kondena arguidu ho pena prizau tinan ida suspende ba tinan tolu.

Entretantu defeza husu tribunál atu haree didiak akuzasaun kona-ba arma brankas tanba iha elementu balun la priense tanba ne'e husu tribunál atu tetu antes deside.

Desizaun

Depois de avalia faktu hotu tribunál konklui prosesu ne'e no absolve arguidu husi krime amesa tanba tribunál la iha prova suficiénte no iha faktu provadu ba arguidu mak pose arma branka no tanba ne'e tribunál kondena arguidu ba pose arma brankas ho pena prizaun tinan tolu suspende ba tinan tolu fulan rua.

12. Krime maus-tratus ba kónjuje ho natureza violénsia doméstika

Nú. Prosesu : 0255/21.DICMR
Kompozisaun Tribunál : Koletivu
Juis : Dra. Albertina Neves, Dr. Ivan José S. P. Antonino, Dra Ana Paula
Prokuradór : Dr. Luis Hernani Rangel da Cruz
Defeza : Dr. Nelson Borges
Desizaun : Pena prizaun tinan 2 suspende ba tinan 3

Iha 24 Janeiro 2023, Tribunál Judisiál Primeria Instánsia Díli prezide julgamentu leitura akordaun ba krime maus-tratus ba kónjuje ho natureza violénsia doméstika ne'ebé envolve arguidu J CV hasoru nia feen, iha Munisípiu Díli.

Akuzasaun Prokuradór

Prokuradór akuza katak iha data ne'ebé la apura maibé iha fulan Abril 2020, arguidu ho kondisaun lanu, nune'e lezada kaer arguidu nia liman haruka sai ba liur, maibé arguidu kaer lezada nia liman hodi rasta no hakanek lezada nia liman karuk konsekuénsia husi arguidu nia hahalok ne'e lezada hetan kanek iha liman parte karuk.

Tuir mai iha 17 Maiu 2021, iha oras tuku 23:59 kalan, arguidu ho lezada diskute malu kona-ba atu taka ahi, nune'e, arguidu lori kilometrazen motor nian baku lezada nia oin no rasta kilometrazen ba lezada nia liman hodi rezulta kanek, mean no raan iha lezada nia matan laran parte leten kanek iha lezada nia inus no riska mean iha lezada nia ibun.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarasaun katak arguidu halo agresaun ne'e ho kondisaun lanu, arguidu arrepende ona nia hahalok no diak malu ona ho lezada.

Arguidu konfesa intergralmente ba faktu hotu iha akuzasaun, nune'e tribunál presinde lezada ninia deklarasaun.

Alegasaun finál

Prokuradór konsidera arguidu provadu komete krime maus-tratus ba kónjuje hasoru lezada, nune'e atu prevene krime ne'e akontese tan iha futuru husu ba tribunál atu kondena arguidu ho pena prizaun tinan tolu suspende ba tinan tolu.

Entretantu husu ba tribunál atu kondena arguidu ho pena ne'ebé adekuaadu ho konsiderasaun katak, arguidu konfesa, arrepende ona nia hahalok no diak malu ona ho lezada.

Desizaun

Depoisde avalia faktu hotu tribunál prova katak iha fulan Abril 2020, arguidu kaer lezada nia liman hodi rasta no hakanek lezada nia liman karuk konsekuénsia husi arguidu nia hahalok ne'e lezada hetan kanek iha liman parte karuk, iha 17 Maiu 2021, arguidu lori kilometrazen motor nian baku lezada nia oin no rasta kilometrazen ba lezada nia liman hodi rezulta kanek, mean no raan iha lezada nia matan laran parte leten kanek iha lezada nia inus no riska mean iha lezada nia ibun.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepede ona nia hahalok no diak malu ona ho lezada, nune'e tribunál konklui prosesu ne'e no kondena arguidu ho pena prizaun tinan rua suspende ba tinan tolu.

13. Krime ofensa ba integridade física simples ho natureza violénsia doméstika

Nú. Prosesu : 0224/21 DIBCR
Kompozisaun Tribunál : Singulár
Juis : Dr. Ivan Patrisinio Suritay Antonino Gonçalves
Prokuradór : Dr. Napoliao da Silva
Defeza : Dr. Marcelino Coro

Desizaun : Pena multa US\$60.00

Iha 24 Janeiro 2023, Tribunál Judisiál Primeria Instánsia Díli prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu AdS hasoru nia feen, iha Munisípiu Díli.

Akuzasaun prokuradór

Prokuradór akuza katak iha 7 Outubru 2021, iha oras tuku 10:00 dadeer, arguidu tuku dala rua iha lezada nia matan parte karuk, tuku dala rua iha lezada niaibun, rasta lezada nia fuuk no ros lezada nia reen - toos ba iha paredi, rezulta bubu no metan iha lezada nia matan parte loos, bubu ihaibun no bubu no mean iha lezada nia reen-toos. Antes agresaun ne'e, arguidu ho lezada diskute malu kona-ba arguidu deskonfia lezada ho nia kolega feto konta sira nia namora pasadu nian nune'e arguidu halo agresaun ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu uza ninia direitu nonook. Entretantu lezada konfirma faktu hotu iha akuzasaun no deklarata katak depoisde akontesimentu ne'e liutiha loron rua, arguidu nia inan aman ba rezolve kedas kazu ne'e iha lezada nia inan-aman nia uma no sira diak malu fali ona to'o agora. lezada mós deklarata katak depoisde akontesimentu ne'e to'o agora arguidu la komete tan krime seluk hasoru lezada.

Alegasaun finál

Prokuradór haktuir katak mezmua arguidu uza nia direitu nonook maibé lezada konfirma faktu hotu iha akuzasaun no konfirma mós fotografia iha autus, nune'e prokuradór konsidera arguidu nia aktu ne'e priense duni elementu husi krime ofensa ba integridade fizika simples tuir artigu 145 KP ho natureza violénsia doméstika ho razaun sira ne'e prokuradór husu ba tribunál atu kondena arguidu ho pena prizaun fulan haat suspende ba tinan ida.

Defeza iha nia alegasaun, haktuir katak mezmua arguidu uza nia direitu nonook maibé familia husi arguidu nian ba rezolve ona kazu ne'e no arguidu ho lezada diak malu ona no kontinua moris hamutuk hanesan feen-laen, nune'e husu ba tribunál atu aplika pena ne'ebé adekuadu ba arguidu.

Desizaun

Depoisde avalia faktu hotu tribunál prova katak arguidu tuku dala rua iha lezada nia matan parte karuk, tuku dala rua iha lezada nia ibun, rasta lezada nia fuuk no ros lezada nia reen - toos ba iha paredi, rezulta bubu no metan iha lezada nia matan parte loos, bubu iha ibun no bubu no mean iha lezada nia reen-toos.

Bazeia ba faktu provadu hirak ne'e no tetu mós ho sirkunstánsia atenuante sira hanesan depoisde akontesimentu arguidu nia inan aman ba rezolve fali problema ne'e no sira continua moris hamutuk hanesan feen ho laen, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu 0,50 sentavus kada loron durante loron 180. Tribunál mós fiksa pena alternative durante loron 60 prizaun, bainhira arguidu la kumpri pena multa refere.

14. Krime ofensa ba integridade física simples ho natureza violência doméstica

Nú. Prosesu : 0297/21 DICMR
Kompozisaun Tribunál : Singulár
Juis : Dr. José Gonçalves
Prokuradór : Dr. Luis Hernani Rangel
Defeza : Dr, Francisco Caetano
Desizaun : Pena multa US\$96.00

Iha 26 Janeiro 2023, Tribunál Judisiál Primeria Instánsia Díli Prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu MO hasoru nia feen, iha Munisípiu Díli.

Akuzasaun Prokuradór

Prokuradór akuza katak iha 04 Jullu 2021, iha oras besik tuku 04:00 madrugada, iha arguidu ho lezada nia hela fatin, arguidu tuku dala ida ho maka'as iha lezada nia kanotak parte loos nomós tolok lezada. Konsekuénsia husi arguidu nia aktu ne'e rezulta lezada sente moras maka'as iha kanotak perte loos no la ba halo tratamentu saúde.

Prokuradór akuza arguidu kontra artigo 145 KP kona-ba ofensa ba integridade física simples ho moldura penál to'ó tinan 3 ka multa konjuga ho artigo 2, 3 a), 35 b) no 36 LKVD.

Produsaun ba prova sira

Iha julgamentu, arguidu konfesa integralmente ba faktu hotu iha akuzasaun no deklara katak iha momentu ne'ebá arguidu partisipa nia patraun selebra tinan nune'e fila madrugada ho kondisaun lanu mak halo agresun hasoru lezada, depoisde akontese liu loron haat arguidu husu fali deskulpa ba lezada, sira di'ak malu ona no arguidu arrepende nia hahalok nomós foin primeiravés mai hatán iha tribunál.

Alende ne'e, lezada mós konfirma faktu hotu iha akuzasaun no depoisde akontesimentu lezada sente nia kanotak moras durante semana ida, depoisde akontesimentu liu loron haat hanesan ne'e mak sira di'ak malu fali, arguidu husu ona deskulpa ba lezada no la mosu tan problema to'o agora.

Alegasaun finál

Prokuradór haktuir katak arguidu konfesa integralmente ba faktu hotu iha akuzasaun no konfirma mós husi lezada nune'e prokuradór entende katak arguidu nia hahalok prenze duni elementu krime ofensa ba integridade fízika simples ho natureza violénsia doméstika nune'e prokuradór husu ba tribunál atu kondena arguidu ho pena prizaun fulan tolu suspende ba tinan ida.

Entretantu parte defeza husu ba tribunál atu konsidera sirkunstánsia atenuante sira no husu mós pena ne'ebé adekuaudu tuir arguidu nia aktu tanba iha produsaun ba prova arguidu konfesa integralmente ba faktu no lezada mós mai konfirma katak deposesde akontesiemntu arguidu la halo tan ona krime.

Desizaun

Deposde avalia faktu hotu, tribunál prova katak arguidu tuku maka'as dala ida iha lezada nia kanotak parte loos tanba arguidu ho kondisaun lanu. Bazeia ba faktu provadu ne'e no tetu mós sirkunstánsia atenuante sira hanesan arguidu konfesa integralmente ba faktu, primeiravés mai hatan iha tribunál, arrende ona nia hahalok no diak malu ona ho lezada. Nune'e tribunál konklui prosesu ne'e no kondena arguidu ho pena multa US\$ 96.00 ne'ebé arguidu sei selu 0,80 sentavus durante lora 120. Tribunál mós fiksa pena alternativa durante lora 80 prizaun, bainhira arguidu la kumpri pena multa refere.

15. Krime ofensa ba integridade fízika simples ho natureza violénsia doméstika

Nú. Prosesu : 0001/21.LIBZT
Kompozisaun Tribunál : Singulár
Juis : Dr. Argentino Nunes
Prokuradór : Dr. Napolião Soares da Silva
Defeza : Dr. José da Silva
Desizaun : Pena multa US\$67.50

Iha 27 Janeiro 2023, Tribunál Judisiál Primeria Instánsia Díli prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AAGR hasoru nia feen, iha Munisípiu Likisá.

Akuzasaun prokuradór

Prokuradór akuza katak Iha 31 Dezembru 2020, iha oras maiszumenus tuku 19:00 kalan, arguidu tuku dala ida ho maka'as iha lezada nia kotuk laran, tuku dala ida ho maka'as iha lezada niaibun kulit no haksoit hodi tebe dala ida iha lezada nia hirus matan halo lezada monu kedas ba kuartu laran, konsekuensia direta husi agresaun fízika ne'e lezada sofre moras maka'as iha kotuk laran, kanek no bubu iha ibun kulit sorin karuk.

Kauza husi problema ne'e, tanba arguidu ba partisipa serimonia funeral nia kolega nian, maibé la fó hatene ba lezada no la lori telemóvel, nune'e lezada hirus hodi tolok arguidu mak arguidu halo agresaun fízika hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2, 3 (a), 35 (b) no 36

LKVD.

Produsaun ba prova sira

Iha prosesu julgamentu arguidu konfesa faktu hotu iha akuzasaun, no deklarata katak depoisde akontesimentu ne'e arguidu husu ona diskulpa ba lezada no agora dadaun nafatin moris hamutuk iha uma ida hanesan feen ho laen no foin primeiravés mai hatan iha tribunál.

Alende ne'e, lezada kontinua konfirma faktu hotu iha akuzasaun no konfirma mós ho arguidu nia deklarasaun katak depoisde akontesimentu ne'e arguidu husu ona diskulpa ba lezada no agora dadaun sira moris hamutuk nafatin hanesan feen ho laen no depoisde akontesimentu ne'e arguidu la komete tan krime seluk hasoru lezada.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mós husi lezada, nune'e atu prevene krime ne'e akontese tan iha futuru husu ba tribunál atu kondena arguidu ho pena multa.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun, arguidu konfesa, husu ona diskulpa ba lezada no foin primeiravés mai hatan iha tribunál.

Desizaun

Depoisde avalia faktu hotu tribunál prova katak arguidu tuku dala ida ho maka'as iha lezada nia kotuk laran, tuku dala ida ho maka'as iha lezada niaibun kulit no haksoit hodi tebe dala ida iha lezada nia hirus matan halo lezada monu kedas ba kuartu laran.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, husu ona diskulpa ba lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$67.50 ne'ebé arguidu sei selu 0.75 sentavus, durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

16. Krime ofensa ba integridade fízika simples ho natureza violénsia doméstika.

Nú. Prosesu	: 0031/22.LILIQ
Kompozisaun Tribunál	: Singulár
Juis	: Dr. Ivan Patrocinio Antonino Gonçalves
Prokuradór	: Dr. Luis Hernani Rangel da Cruz
Defeza	: Dr. José da Silva
Desizaun	: Absolve

Iha 27 Janeiro 2023, Tribunál Judisiál Primeria Instánsia Díli prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguida MCIdJ, hasoru nia Laen, iha Munisípiu Likisa.

Akuzasaun Prokuradór

Prokuradór akuza katak Iha 11 Juñu 2022, maizumenus iha oras tuku 18:00 lokraik, arguida ho lezadu diskute malu nune'e arguida foti martelu atu baku lezadu maibé la konsege tanba testemuña mak satan netik, maibé arguida ho lezadu kontinua halo aksaun ba malu, nune'e arguida kaer tiha lezadu nia liman maka dudu ba kopu rahun iha rai, nune'e lezadu hetan kedas kanek iha liman, konsekuénsia husi arguida nia hahalok ne'e rezulta lezadu sofre moras no kanek iha liman.

Produsaun ba prova sira

Iha prosesu julgamentu arguida hili direitu nonok. Enkuantu lezadu deklara katak iha akontesimentu ne'e lezadu ho arguida diskute malu kona-ba arguida diskonfia lezadu amante (selingkuh) ho fetu seluk, nune'e arguida nervozu hodi halo rahun hotu sikra no kona iha lezadu nia liman rezulta kanek, lezadu mós deklara katak diak malu ona ho arguida no sei kontinua hela hamutuk iha uma ida.

Alegasaun finál

Prokuradór haktuir katak iha produsaun ba prova lezadu deklara katak laos arguida mak halo lezadu nia liman raan, maibé ne'e hanesan antesende ida tanba laos arguida mak baku lezadu maibé lezadu nia liman mak kona sikra rahun no kauza kanek, nune'e husu ba tribunál atu absolve tiha prosesu ne'e.

Defeza mós konkorda ho prokuradór atu absolve tiha prosesu ne'e tanba bazeia ba produsaun ba prova lezadu deklara katak laos arguida mak baku lezadu maibé lezadu nia liman mak kona sikra rahun no kauza kanek.

Desizaun

Depoide avalia faktu hotu tribunál konsidera faktu hotu la provadu, nune'e tribunál konklui prosesu ne'e no absolve arguidu husi prosesu ne'e.

17. Ofensa ba integridade fízika simples ho natureza violénsia doméstika

Nú. Prosesu	: 0145/20.LIBZT
Kompozisaun Tribunál	: Singulár
Juis	: Dr. Argentino Nunes
Prokuradór	: Dr. Luis Hernani Rangel da Cruz
Defeza	: Dr. José da Silva
Desizaun	: Pena multa US\$60.00

Iha 27 Janeiro 2023, Tribunál Judisiál Primeria Instánsia Díli prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu SdS (laen) no arguida LdS (banin) hasoru arguidu nia feen, iha Munisípiu Likisá.

Akuzasaun Prokuradór

Prokuradór akuza katak iha 25 Dezembru 2020, maiszumenus iha oras tuku 18:00 lokraik, arguida rasta lezada husi kotuk no riba lezada ba rai kauza moras, hafoin arguidu tebe dala ida iha lezada nia hirus matan kauza moras maka'as. Antes agresaun ne'e, arguidu no arguida diskute malu ho lezada kona-ba lezada lori fila nia oan husi arguidu

sira nia uma la fó hatene ba arguidu sira. Konsekuénsia husi arguidu sira nia hahalok ne'e halo lezada senti moras iha kotuk laran no hirus matan.

Produsaun ba prova sira.

Iha prosesu julgamentu arguidu no arguida deklara katak faktus sira ne loos hotu ho razaun tanba lezada mai foti labarik sem kuñesimentu arguida no arguidu nian nune'e arguida halo agresaun ne'e hasoru lezada. Arguida no arguidu negociante, arguida ho arguidu hela hamutuk iha família nia uma, arguidu sira dadaun ne'e trata hela dokumentus atu ba serbisu iha Australia.

Tribunál labele rona lezada ninia deklarasaun tanba lezada edital.

Alegasaun finál

Prokuradór haktuir katak arguidu no arguida konfesa faktu hotu iha akuzasau no rekoñese sira nia hahalok sira, nune'e husu ba tribunal fó pena ba arguidu no arguida tuir sira ninia nesesidade.

Alende ne'e defeza mós haktuir katak arguidu sira rekoñese duni sira nia asaun sira hasoru lezada nune'e defeza husu ba tribunal atu fó pena multa tuir arguidu sira ninia nesesidade.

Desizaun

Depoisde avalia faktu hotu, tribunal prova katak arguida rasta lezada husi kotuk no riba lezada ba rai kauza moras, hafoin arguidu tebe dala ida iha lezada nia hirus matan kauza moras maka'as.

Bazeia ba faktu provadu hirak ne'e tribunal konklui prosesu ne'e no kondena arguidu no arguida ho pena multa US\$90.00, ne'ebé arguidu no arguida sei selu 0,50 sentavus kada loron durante loron 180. Tribunal mós fiksa pena alternativa durante loron 60 prizaun. Bainhira arguidu no arguida la kumpri pena multa refere.

18. Krime ofensa ba integridade fízika simples ho natureza violénsia doméstika.

Nú. Prosesu	: 0302/22. DICMR
Kompozisaun Tribunál	: Singulár
Juis	: Dra. Albertina Neves
Prokuradór	: Dr. Luis Hernani Rangel da Cruz
Defeza	: Dr. Eustaquio Guterres
Desizaun	: Pena prizaun fulan 3 suspende ba tinan 1

Iha 30 Janeiro 2023, Tribunál Judisiál Primeria Instánsia Díli prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MdCV hasoru nia feen, iha Munisípiu Díli.

Akuzasaun Prokuradór

Prokuradór akuza katak iha 22 Juñu 2022, iha oras tuku 07:00 dadeer, arguidu lori kadeira ne'ebé halo husi besi tuda lezada hodi kona iha lezada nia ulun kauza moras,

arguidu kontinua tebe dala haat iha lezada nia kabun, tuku dala ida iha lezada nia kotuk laran no tuku dala ida iha lezada nia tilun hun, kauza moras. Antes agresaun ne'e, arguidu ho lezada diskute malu kona-ba arguidu hanoin lezada mak haruka arguidu ba kuru be'e, nune'e arguidu tolok lezada no halo agresaun hasoru lezada.

Produsaun ba prova sira

Iha prosesu julgamentu arguidu konfesa faktu hotu iha akuzasaun no deklara katak arrepende ona nia hahalok, foin primeiravés mai hatan iha tribunál no promete sei la komete tan krime hanesan iha futuro.

Alende ne'e lezada kontinua konfirma faktu hotu iha akuzasaun no deklara katak depoisde akontesimentu ne'e arguidu ba tiha polísia no tama tiha sela no bainhira fila fali mai uma arguidu husu ona diskulpa ba lezada no depoisde akontesimentu ne'e arguidu la komete ona krime seluk hasoru lezada.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mós husi lezada, nune'e atu prevene krime ne'e akontese tan iha futuro husu ba tribunál atu kondena arguidu ho pena prizaun fulan tolu suspende ba tinan ida.

Entretantu defeza husu ba tribunál atu fó pena ne'ebé justu ho konsiderasaun katak arguidu konfesa, arrepende nia hahalok no foin primeiravés mai hatan iha tribunál no promete sei la komete tan krime hanesan iha futuro.

Desizaun

Depoisde avalia faktu hotu tribunál prova katak arguidu lori kadeira ne'ebé halo husi besi tuda lezada hodi kona iha lezada nia ulun kauza moras, arguidu kontinua tebe dala haat iha lezada nia kabun, tuku dala ida iha lezada nia kotuk laran no tuku dala ida iha lezada nia tilun hun.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ona nia hahalok, foin primeiravés mai hatan iha tribunál no promete sei la komete tan krime hanesan iha futuro. Ho nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

19. Krime omisídiu negligente

Nú. Prosesu	: 0151/22. TRDIL
Kompozisaun Tribunál	: Singulár
Juis	: Dra. Albertina Neves
Prokuradór	: Dr. Renato Bere Nahak
Defeza	: Dr. Eustaquio Guterres
Desizaun	: Pena prizaun fulan 3 suspende ba tinan 1

Iha 30 Janeiro 2023, Tribunál Judisiál Primeria Instánsia Díli prezide julgamentu leitura sentensa ba krime omisídiu negligente ne'ebé envolve arguidu Agostinho de Oliveira

Pereira hasoru lezadu Venancio Mendonca Sequeira, iha Munisípiu Díli.

Akuzasaun Prokuradór

Prokuradór akuza katak iha 26 Feveireu 2022, arguidu kondus motor marka Honda Mega Pro, kor mutin ho Nú matrikula I 8860 husi diresaun Baukau atu mai Díli. Bainhira to'o iha Hera por volta iha oras tuku 16:20 hodi soke vítima Venancio Mendonça Sequeira ne'ebé konduz motor Honda Revo Fit, kor metan, ho Nú matrikula J 7954, vítima monu ba rai hetan kanek no evakua kedas ba iha Ospital Nasionál Guido Valadares, maibé liu deit loron rua vítima hakotu iis.

Produsaun ba prova sira

Iha prosesu julgamentu arguidu deklara katak faktu sira ne'e balun loos no balun laloos faktu ne'ebe laloos mak akontesimentu ne'e laos iha Hera maibé Metinaro no iha akontesimentu ne'e halai hasoru malu, laos halai tutuir malu no momentu ne'e vítima baku lampu ba loos, maibé ba fali karuk nune'e arguidu rem la biban hodi soke vítima, depoisde akontesimentu liutiha loron ida mak arguidu foin sadar katak vítima mate, mezmú arguidu iha ospital hela arguidu nia família sira ba polisia hodi rezolve tuir família no kontribui ba vítima nia funeral ho montante osan US\$2.000.00, no vítima nia família sira mós fó fahi ida ba arguidu nia família sira hodi halo modo. Arguidu mós deklara katak iha oan nain neen no oan sira ne'e escola hotu, arguidu nia profisaun nu'udar edukador ho salariu US\$321 kada fulan, hela iha uma rasik no foin primeiravés mai hatan iha tribunál no arguidu arrepende ona nia hahalok no arguidu mós la espera atu akontese hanesan ne'e.

Alegasaun finál

Prokuradór haktuir katak depoisde rona tiha arguidu nia deklarasaun prokuradór husu ba tribuál fó pena ne'ebé kiik liu ba arguidu.

Defeza mós konkorda ho alegasaun prokuradór nian atu kondena arguidu ho pena ne'ebé kmaan tanba arguidu responsavel ba nia hahalok no fó ona osan funeral nian ba vítima nia família no arguidu mós la espera atu akontese nune'e.

Desizaun

Depoisde avalia faktu hotu tribunál prova katak arguidu komete duni krime omisídiu negligente. Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, foin primeiravés mai hatan iha tribunál. Ho nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

20. Krime ofensa ba integridade física simples ho natureza violéncia doméstika.

Nú. Prosesu	: 0360/22.DICMR
Kompozisaun Tribunál	: Singulár
Juis	: Dr. Ivan Patrocino Suritay Antonino Gonçalves
Prokuradór	: Dr. Napolião Soares da Silva
Defeza	: Dr. Sergio Quintas
Desizaun	: Pena multa US\$120.00

Iha 30 Janeiro 2023, Tribunál Judisiál Primeria Instánsia Díli prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu TdC hasoru nia feen, iha Munisípiu Díli.

Akuzasaun Prokuradór

Prokuradór akuza katak iha 18 Jullu 2022, iha oras maizumenus tuku 09:00 dadeer, arguidu tolok lezada ho liafuan ne'ebé ladiak no tebe dala ida iha lezada nia kidan parte sorin loos, tuku dala ida iha lezada nia kotuk laran, tebe dala rua iha lezada nia kabun mamar, no tuku dala barak iha lezada kotuk laran, lori liman sikun fai dala ida iha lezada nia tilun hun. Konsekuénsia husi agresaun fízika ne'e lezada hetan moras, bubu no mean iha inus, moras maka'as, kanek no mean iha lezada nia liman sorin parte karuk, no moras iha kotuk laran. Antes agresaun ne'e, arguidu ho lezada diskute malu kona-ba lezada ba tarata dokumentu veteranus nian iha Ermera no foin fila ba uma iha lokraik.

Produsaun ba prova sira

Iha prosesu julgamentu, arguidu deklara katak faktu sira ne'e loos hotu arguidu mós deklara katak halo agresaun fízika hasoru lezada tanba arguidu ho kondisaun lanu no labele kontrola an, arrepende ona nia hahalok no deklara mós katak baku feen ne'e hahalok ne'ebé aat no depisde akontesimentu ne'e diak malu ona ho lezada.

Alende ne'e lezada mós kontinua konfirma faktu hotu iha akuzasaun no deklara mós katak depisde akontesimentu ne'e diak malu ona ho arguidu.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian no konfirma mós husi lezada, nune'e atu prevene krime ne'e akontese tan iha futuru husu ba tribunál atu kondena arguidu ho pena efetiva fulan haat prizaun.

Entretantu defeza husu ba tribunál atu kondena arguidu ho pena ne'ebé adekua ho konsiderasaun katak arguidu konfesa, arrepende ona nia hahalok, diak malu ona ho lezada. Arguidu nia kondisaun no situasaun nu'udar aman ou sai hanesan xefe família iha sira nia uma laran no arguidu rasik mak buka osan hodi sustenta sira nia família.

Desizaun

Depisde avalia faktu hotu tribunál prova katak arguidu tolok lezada ho liafuan ne'ebé ladiak no tebe dala ida iha lezada nia kidan parte sorin loos, tuku dala ida iha lezada nia kotuk laran, tebe dala rua iha lezada nia kabun mamar, no tuku dala barak iha lezada kotuk laran, lori liman sikun fai dala ida iha lezada nia tilun hun.

Bazeia ba faktu provadu hirak ne'e no tetu mós ho sirkunstánsia atenuante sira hanesan, arguidu konfesa, arrepende ona nia hahalok, diak malu ona ho lezada no promete sei la repete tan krime hanesan iha futuru. Nune'e tribunál konklui prosesu ne'e no kondena arguidu ho pena multa US\$120.00 ne'ebé arguidu sei selu US\$1.00 kada loron, durante loron 120. Tribunál mós fiksa pena alternativa durante loron 80 prizaun bainhira arguidu la kumpri pena multa refere.

21. Krime ofensa ba integridade fízika simples ho natureza violénsia doméstika

Nú. Prosesu : 0004/22 DART
Kompozisaun Tribunál : Singulár
Juis : Dra. Ana Paula Fonseca
Prokuradór : Dr. Luis Hernani Rangel
Defeza : Dr. Fernando de Carvalho
Desizaun : Absolve

Iha 16 Janeiro 2023, Tribunál Judisiál Primeria Instánsia Díli prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu SMdJ hasoru nia feen, iha Munisípiu Díli.

Akuzasaun prokuradór

Prokuradór akuza katak iha 20 Dezembru 2022, iha oras tuku 10 dadeer, arguidu rasta lezada nia fuuk riba ba rai. Antes agresaun ne'e, arguidu ho lezada diskute malu kona-ba lezada husu ba arguidu atu tula lezada ho sira nia oan ba Manleuana, maibé arguidu lakohi, ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2, 3 (a), 35 (b) no 36 LKVD.

Produsaun ba prova sira

Iha julgamentu, arguidu deklara katak kazu ne'e akontese duni maibé julga ona no desizaun arguidu selu multa.

Alende ne'e lezada mós konfirma katak kazu ne'e julga ona no tribunál kondena arguidu ho pena multa.

Alegasaun finál

Prokuradór haktuir katak mezmú arguidu no lezada deklara katak kazu ne'e desizaun ona maibé prokuradór mantein ho nia akuzasaun no haktuir katak meus arguidu nian rasta lezada nia fuuk no riba ba iha rai hanesan ho kazu ne'ebé akontese ona iha 2021, maibé data akontesimentu diferente ida akontese iha 16 Novembru 2021 no kazu ida ne'e akontese iha 20 Dezembru 2022, ho tempu ne'ebé dook tebes, tanba ne'e prokuradór fiar no husu ba tribunál atu kondena arguidu ho pena prizaun fulan neen suspende ba tinan ida.

Entretantu defeza husu ba tribunál atu haree didiak iha sistema tanba arguidu no lezada ninia deklarasaun ida deit katak kazu ne'e tribunál julga ona no fó ona kondensasaun ba arguidu no karik kazu ne'e julga ona defeza husu atu absolve arguidu.

Desizaun

Depoisde avalia faktu hotu no haree mós iha sistema katak kazu ne'e julga ona no

arguidu hetan ona kondenasau nune'e tribunál konklui prosesu ne'e no absolve arguidu husi prosesu ne'e.

22. Krime ofensa ba integridade fízika simples ho natureza violénsia domestic

Nú. Prosesu : 0114/22 PDDIL
Kompozisaun Tribunál : Singulár
Juis : Dra. Ana Paula Fonseca
Prokuradór : Dr. Luis Hernani Rangel
Defeza : Dr. Sebastião Amado
Desizaun : Pena multa US\$60.00

Iha 16 Janeiro 2023, Tribunál Judisiál Primeria Instánsia Díli prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DVS hasoru lezada EM, iha Munisípiu Díli.

Akuzasaun

Prokuradór akuza katak iha 27 Fevereiro 2021, iha oras ne'ebé la apura maibé iha meidia, arguidu tuku dala ida iha lezada nia matan parte loos, buti lezada nia kakorok, tebe dala ida iha lezada nia kidan no tuda lezada ho xave motor nian no kona iha lezada nia reen-toos. Antes agresaun ne'e, arguidu ho lezada diskute malu kona-ba bainhira arguidu tula nia alin ba iha Hera, lezada hameno ba arguidu katak fila husi hera hola ho labarik nia susuben, maibé bainhira arguidu fila husi Hera la hola sira nia oan nia susuben, ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2, 3 (a), 35 (b) no 36 LKVD

Produsaun ba prova sira

Iha julgamentu, arguidu konfesa integralmente ba faktu hotu iha akuzasaun no deklara arrepende ona nia hahalok no depoisode akontesimentu ne'e lezada halai ba nia inan-aman nia uma no seidauk fila ba uma to'o agora.

Alende ne'e, lezada mós konfirma faktu hotu iha akuzasaun no deklara katak nia halai ba nia inan-aman nia uma tanba arguidu mak duni lezada no durante lezada ho nia oan sira iha nia inan-aman nia uma arguidu nunka ba haree.

Alegasaun final

Prokuradór konsidera arguidu provadu komete krime krime ofensa ba integridade fízika simples ho natureza violénsia doméstika hasoru nia feen tuir akuzasaun prokurador nian, bazeia ba konfisaun arguidu nian no konfirma mós husi lezada, tanba ne'e atu prevene krime hanesan akontese tan iha futuro husu ba tribunál atu kondena arguidu ho pena multa.

Entretantu defeza iha nia alegasaun husu ba tribunál atu kondena arguidu ho pena ne'ebé adekuadu ho konsiderasaun katak, arguidu konfesa no arrepende ona nia hahalok.

Desizaun

Depoisde avalia faktu hotu tribunál prova katak arguidu tuku dala ida iha lezada nia matan parte loos, buti lezada nia kakorok, tebe dala ida iha lezada nia kidan no tuda lezada ho xave motor nian no kona iha lezada nia reen-toos.

Bazeia ba faktu provadu hirak no tetu mós ho sirkunstánsia atenuante sira hanesan arguidu konfesa no arrepende ona nia hahalok, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu 0,50 sentavus kada loron, durante loron 120. Tribunál mós fiksa pena alternative durante loron 80 prizaun, bainhira arguidu la kumpri pena multa refere.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: ana@jsmp.tl

info@jsmp.tl

Website: <http://jsmp.tl>